

www.BibleForChildren.org


Mateo 8



Oxib' q'ij rik'owik wa', x'an jun k'ulanikil pa ri tinamit Caná re Galilea. Ruchu ri Jesús e jun chike ri e k'o chiri'. Ek'u ri Jesús, junam kuk' rutijo'n, xesik'ix pa ri k'ulanikil.



Yey k'amaja' ne kak'is ri nimaq'ij echiri' xk'is ri vino. Ek'u ruchu ri Jesús xub'i'ij che: —Xk'is ri vino ketajin che ujachik —xcha'. Ek'u ruchu ri Jesús xub'i'ij chike ri keniman chiri': —E 'ana alaq ronoje ri kub'i'ij rire che alaq —xcha'.



Ri Jesús xub'i'ij chike ri keniman
chiri': —Nojisaj alaq che ya' taq wa
tena'x —xcha'. Jun aj chak kunojisaj
tena'x che ya' (Juan 2:7) Ek'u rike
xkinojisaj chi utz.



Ek'uchiri', ri Jesús xub'i'ij chike:
—Wo'ora chesaj lo alaq jub'iq' y k'ama
b'i alaq che ri aj wach re wa nimaq'ij
—xcha'. Y rike jela' xki'ano.



Ek'u ri aj wach re ri
nimaq'ij xuna' ri ya' 'anom
vino che, tob' na reta'am
ta nenare' pa xpe wi.
Xew ri keniman chiri'
keta'am, ma e rike
xeb'esan lo ri ya'.



Ek'u ri aj wach xusik'ij rala xk'uli'ik y jewa' xub'i'ij
che: —Konoje ri Tikawex nab'e na e kakijach ri
chomilaj vino, yey echiri'
ri echokom lik k'i chi ri
kitijom, k'a ek'uchiri'
kajachi' ri xaqi tob'
vino. No'j ri'at k'a
e la' xawesaj lo
ri saqil vino
che wa k'isb'al
re wa nimaq'ij
—xcha'.



E nab'e k'utub'al wa' re ruchuq'ab' ri Dios xu'an ri
Jesús chila' Caná re Galilea.


Ruk' wa' xuq'alajisaj ri
unimal uwach uq'ij y
ruma la' rutijo'n lik
xkub'i' kik'u'x ruk'.



Ri Jesús xopon chirocho ri Pedro.
Chiri' k'u ri' xril ruchu-uji' ri
Pedro k'o chwa uwarab'al y lik
k'o aq' chirij.



Ek'u ri Jesús xuchap ruq'ab' y jek'ula' xik'ow ri aq'
chirij. Ek'uchiri', rixox xyaktajik y xujeq keb'unimaj.




Echiri' b'enaq chi ri q'ij e
ri' kayub'ub' chik, xek'am
lo chwach ri Jesús
konoje ri yewa'ib'
y ri e k'o pakiq'ab'
itzel uxlab'ixel. Y
konoje ri tikawex re
ri tinamit xet'iqi'
chuchi' ri puerta
re ri ja.



Ek'u ri Jesús xeb'ukunaj uk'iyal yewa'ib'
che uk'iyal uwach taq yab'il y xeb'eresaj b'I
uk'iyal itzel uxlab'ixel; pero na xuya ta luwar
chike kech'awik ma rike keta'am china Rire.



Ruma k'u ri kiyab'il, konoje ri winaq kakaj kakichap ri
Jesús, ma Rire ruk' ruchuq'ab' keb'ukunaj konoje.



Ek'uchiri', xek'un kajib' achijab' kitelem
lo jun achi sik.



Yey na xkiriq taj su'anik kakiya
pan chwach ri Jesús kuma ruk'iyal
winaq. Ewi xkiteq'eb'a' ruwi
ri ja pa k'o wi ri Jesús,
xkesaj julepaj che.



Chiri' k'u ri' xkiqasaj wub'i la
ch'at pa kotz'ol wi ri sik.
Rachijab' kakiqasaj lo
jun sik chwach ri Jesús
(Marcos 2:4).




Ek'u ri Jesús echiri' xril
ri kub'ulib'al kik'u'x ruk',
jewa' xub'i'ij che ri
sik: —Wal, ronoje ramak
kuytajinaq chik
—xcha'. Xub'i'ij
k'u ri' che ri sik:
—Chatyaktajoq,
chak'ama b'i
rach'at y jat
cha'wocho
—xcha'.



Ek'uchiri', xok ri Jesús pa
jun barco y rutijo'n xeb'ek
ruk'. Tek'uchiri', xpe jun
nimalaj kaqjiq' chwi ri
mar y xujeqo kanoj ri
barco cheya'. Yey ri
Jesús kawarik.



Ri Jesús xuk'ul uwach: —¿Su' chak lik kixi'ij iwib'?
Ri'ix lik xa jub'iq' ri kub'ulib'al ik'u'x wuk' —xcha'.
Ek'uchiri' xyaktajik, xuq'atej ri kaqjiq' y ri ya'.
Xtani' k'u ri' ri kaqjiq' y ri ya' xyeni'ik.
Rutijo'n lik xkam kanima' che y
xkib'i'ij: «¿Sa' ruwach
wa' wa'chi? iMa tob'
ne e ri kaqjiq' y ri ya'
kakikoj utzij!» xecha'.



Ri Dios lik k'ax xeb'una' ri e k'o che
ruwachulew; y ruma k'u wa', xutaq
lo Ruk'ajol, ri lik xew Uk'ajol ri', cha'
china ri kakub'i' uk'u'x ruk' Rire na
kasach ta uwach, ma k'o
uk'aslemal na jinta
utaqexik.



Romanos 3:23

Konoje k'u ri tikawex emakuninaq y lik naj e k'o wi lo che
ri unimal uchomalil ri Dios.

Romanos 6:23

Ma ri tojb'al re ri mak e ri kamik, no'j ri sipanik kuya ri
Dios e ri k'aslemal na jinta utaqexik ruma ri
Qanimajawal Jesucristo.

Hebreos 9:27

Lik k'u jikib'am chi uwach konoje ri tikawex xa julaj
kekamik, tek'uchiri' kape ri q'atb'al tzij pakiwi'.

Efesios 2:8,9

Ma ruma k'u ri unimal rutzil uk'u'x ri Dios k'o
kolob'etajik alaq yey wa' e ruma xkub'i' k'u'x alaq ruk'
ri Cristo. Y ri kolob'etajik, na alaq ta xch'akow re, ma e
jun sipanik re ri Dios che alaq.



Ri kolob'etajik na kariqitaj ta k'u ri' ruma ri utz ka'an
alaq, cha' jela' na jinta junog kutak'ab'a' uq'ij.

Romanos 10:9,10

We ri'at kaq'alajisaj ruk' ruchi' aqul: «Ri Jesús e
Wajawal» y kakoj k'u chupa rawanima' Rire xk'astaj lo
ruma ri Dios chikixo'l ri ekaminaq, ri' katkolob'etajik.

Ma pa ri qanima' kaqakoj wi wa' cha' koju'an jusuk'
chwach ri Dios; yey ruk' k'u ruchi' qaqul, kaqaq'alajisaj
Rire e Qajawal cha' jela' kojkolob'etajik.

Juan 3:16,17

»Ri Dios lik k'ax xeb'una' ri e k'o che ruwachulew; y
ruma k'u wa', xutaq lo Ruk'ajol, ri lik xew Uk'ajol ri',
cha' china ri kakub'i' uk'u'x ruk' Rire na kasach ta
uwach, ma k'o uk'aslemal na jinta utaqexik.



Ma ri Dios na xutaq ta lo Ruk'ajol che ruwachulew re
kolu'q'ata tzij pakiwi ri tikawex; ri xutaq wuloq e cha'
keb'olu'kolob'ej.

1 Juan 5:11-13

Y ri q'alajisam e wa': Ri Dios uya'om qak'aslemal na jinta
utaqexik, yey wa' wa k'aslemal xew kariqitaj ruma
Ruk'ajol. E junog uk'ulum Ruk'ajol ri Dios pa ranima', ri'
ya'tal chi wa' wa k'aslemal che; no'j e junog na uk'ulum
ta Ruk'ajol ri Dios pa ranima', ri' na ya'tal ta wa' wa
k'aslemal che. Kantz'ib'aj pan wa' che alaq ri kojom alaq
rub'i' Ruk'ajol ri Dios, cha' keta'maj alaq k'o k'aslemal
alaq na jinta utaqexik.



Mateo 8-9; Marcos 1-2, 4; Lucas 4, 8; Juan 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Achi New Alphabet Bible (acr) © 2009, Wycliffe Bible
Translators, Inc. All rights reserved.

<https://live.bible.is/bible/ACRNNT/MAT/1>

©2024 Bible for Children, Inc.

www.M1914.org

www.bibleforchildren.org

